

## Xroon sa ó tsikjin ndo Pedro

*Ndo Pedro kjin en ndo xroon sen titikaon Ncháina, sen tsichjeke e ikaxin tjajna*

<sup>1</sup> Jan an, Pedro, ndo Jesucristo kuinche ena ndo ko xruan anna ndo sinta a xrée ndo, me e ikjin xroon ji i ko xruan an xroon ngajinnta ti tsichjeke enta ikaxin tjajna xranchi nunte Ponto, Galacia, Capadocia, Asia, ko Bitinia.

<sup>2</sup> Ja anta, Ndotáina Dio tsikincha anta ndo ixi jaña tsixraxaon ndo ó sa ó, ko ixi juachaxien Espíritue ndo tsikincha anta ndo ixi tsitikaonnta ndo ko jaña tsonjúáxin asáanta ixi jnié ndo Jesucristo. Taye énta juaxruxin tajon ndo Dio ko je e ndo sintanchaonnta ndo.

*Stechon enna naa nge e jian*

<sup>3</sup> Tajonna juasiaina ngajin ndo Dio, Ndotée Ncháina Jesucristo, ixi tsango tjaunna ndo ko bikonóaina ndo me e jongí ena íjngo ixi xechón ndo Jesucristo. Ko méxin stechon enna nge e jian tsij,

<sup>4</sup> tsaye enta nge e jian tsajon ndo Dio, ti chónnda ndo ngajní, naa nge e jua i tsitjáña, ko jua i tsonkítja, ko jua i xroxé nde xranchi itsjo.

<sup>5</sup> Ko ixi chuntianta Ndo Dio, je e ndo tayakon annta ndo ko ixi juachaxien ndo chao tsarichonnta kain nchakon xranchi tsixraxaon ndo ó sa ó. Kain ji i tsonoxin nchakon tsjexin nunte xasintajni.

<sup>6</sup> Méxin, ja anta tsango juaxruxin stenta maski xrojan nge e tangi tsatsinganta kaxin nchakon.

<sup>7</sup> Ixi ti chuntianta Ncháina, me e xranchi chika oro xrokonda tsatsinga chika chringi xro i, ixi jaña tsonoxin á nduaxin jian chika o na i. Méxin, ícha tjintee xrochúntiani Ncháina, ixi chika oro ixi tjexin chika. Ixi siá titikaonnta Ncháina xrokonda tangi tsatsingaxinnta, ko jaña ndo Dio tsikon ndo á bikixi anta ti tangi, me e chao tsaye enta juachaxin ko jian xronichja ndo Jesucristo ixi ja anta nchakon tsii ndo.

<sup>8</sup> Ja anta titikaonnta ndo Jesucristo ko tjue enta ndo maski tikon anta ndo ko tsango chá anta ko jua i xrondachronta ti tsango chaxro juaxruxin me e chondanta,

<sup>9</sup> ixi ja anta ó chondanta juachaxin tsarichonnta kain nchakon, me e juachanta ixi chuntianta ndo Dio.

<sup>10</sup> Nchakon ó sa ó sen kuachronga chijnie ndo Dio juanchangi sen xranchi xrokuechón chujni kain nchakon ko chronga sen ixi ndo Dio xrokuajon ndo juachaxin me e xrokuaye enta ixi tjua anta ndo ko jian ndo.

<sup>11</sup> Espíritue ndo Cristo juincheno e sen kuachronga chijnie ndo Dio ó sa ó ixi ndo Cristo tangi xrokon en ndo, ko tjume e tsayé e ndo juachaxin ijié. Ko je e sen tjaun sen tsono e sen ngisen me e ko ngisa xrokon en nge e ndachro Espíritue ndo Dio.

<sup>12</sup> Ko ndo Dio juincheno e ndo sen ixi nge e chronga sen je a xrokon en nchakon bake e sen. Kain ji i xrokon en nchakon stena jai. Ji i chijni juako anta sen bajako chijni jian ixi juachaxin

Espíritue ndo Dio kuixin ngajní. Ko kain ji i sen ángel kaxon tjaun sen xrobikon sen kaxon.

*Ndo Dio tjaun ndo ndako tsojuna*

<sup>13</sup> Méxin, jian xraxaonnta nge e sinche enta ko jian tsinteenta. Ko ixi tjua anta ndo Dio, méxin ixi nchijí asáanta chon énta nge e tsajon ndo nchakon xrokjan Ncháina Jesucristo.

<sup>14</sup> Xranchi naa chjan titikaon ndotée, jaña nche enta, ko ínche anta xranchi banche enta sa ó ti kuachuxin anta ndo Dio.

<sup>15</sup> Cháña tjúá ko ndako tsinteenta ixi ndo Dio, ndo kuiya anta, je e ndo tjúá ndo.

<sup>16</sup> Ixi xroon chijnie ndo Dio ndachro: “Ja anta tjúá tinteenta xranchi jan an tjúána.”

<sup>17</sup> Siá ndachronta ixi ndo Dio Ndotánta, ndo jian nchéña ijie ngajin kain chujni ixi ti nge e juinche e na, ja anta xrokonda tsitikaonnta ndo ko tájonnta juasianta ngajin ndo kain nchakon tsinteenta nti i nunte xasintajni.

<sup>18</sup> Ndo Dio bingijnanta ndo ixi ítsinte anta xranchi bake e sen tsikachrjenixinnta ó sa ó. Ja anta no anta jian nge e kuenaxinnta ndo, je a ixi naa nge e tsjexin xranchi chika oro o chika plata.

<sup>19</sup> Kuenaxinnta ndo ixi jnié ndo Jesucristo, ijni tsango tjintee ko me e kuayé e ndo Dio, xranchi xrokjui naa kutuchjon xro an nge e xe e ba ko je a ni e ba.

<sup>20</sup> Ndo Dio ó sa ó kuinche e ndo ndo Cristo ti xrako a nunte xasintajni. Ko jai konoxin ndo ixi sen chuntia ndo jian tsintee sen.

<sup>21</sup> Ixi kuen en ndo Cristo me e kuitikaonnta ndo Dio, ndo juinhexechón ndo Cristo nchakon

kuen en ndo, ko je e ndo Dio kuajon ndo ijié juachaxin ngajin ndo Cristo. Ko méxin ja anta chuntianta ndo Dio ko stechon ennta tsarichonnta kain nchakon.

<sup>22</sup> Ko jai ó kuitikaonnta chijni nduaxin ko ixi kuitikaonnta me e kontjúá asáanta, méxin tjue enta sen kichuunta ixi espíritue ndo Dio tingijnanta. Ko xrokonda xrotjue e kichuunta ixi nchijí asáanta.

<sup>23</sup> Ja anta ó jongí anta íjngo. Je a xranchi tjongí e naa chjen en chujni ten en. Ja anta íjngo jongí anta ixi kuitikaonnta chijnie ndo Dio, ndo jichón, ko xro an ngisen sinchetjáña chijni me e.

<sup>24</sup> Ixi ndachro xroon chijnie ndo Dio: Kain chujni nunte xasintajni xranchi kayua ste na, ko juachaxin chónnda na me e xranchi tsjo e ka, ixi ika xema ka ko itsjo chjenjin tsjo,

<sup>25</sup> ko chijnie Ncháina nai a tsitjáña chijni. Ko chijni me e tajon juachaxin tsechónni kain nchakon, chijni, me e ó kuaye é ja anta.

## 2

<sup>1</sup> Méxin, tintu enta kain nge e ña i kuanche enta, Ndachro anta juancheya, tjanoa inta sen kichuunta, tochjuya inta nge e chónnda inaa chujni ko nichja inta kontree chujni.

<sup>2</sup> Nche enta xranchi chjan nchínchín nandá tsijongí e jitayé e xjan itsjin tsi i xjan, jaña ja anta tikakuenxinta tsin ennta chijnie ndo Dio ixi jaña tsjangixinnta sinche enta ti jian ixi jaña tsarichonnta kain nchakon,

<sup>3</sup> ixi ja anta ó chuxinnta ixi Ncháina tsango jian ndo.

### *Ndo Cristo ixro jichón*

<sup>4</sup> Méxin, tonchjiñe enta ngajin Ncháina Jesús, ixi je e ndo me e xranchi naa ixro jichón. Xro me e kuitikaon a chujni ko je e ndo Dio tsikinche e ndo ixro me e ixi ícha tjintee ixro.

<sup>5</sup> Ja anta xranchi ixro tsonde e ndo Dio jitonchjianxin ningue ndo, ko ja anta xrokjannta xranchi ndotaana tjúá aséen ndo ko ixi juachaxien Ncháina Jesucristo tájonnta juasianta ngajin ndo Dio.

<sup>6</sup> Méxin xroon chijnie ndo Dio ndachro: Jan an tsake é ngajin tjajna Jerusalén xranchi naa ixro tsango jian tsitexin nchia, naa ixro tsango tjintee.

Ko ngisen tsitikaon ixro me e, nai a tsosue e sen.

<sup>7</sup> Ja anta ti titikaonnta Ncháina Jesucristo, no anta ixi je e ndo xranchi naa ixro tsango tjintee. Ko chujni kuitikaon a, tson en na xranchi jitaxin xroon chijnie ndo Dio:

Xro kuitikaon a chujni nchekonchjian nchia, ko jai xro me e tsango tjintee xro.

<sup>8</sup> Ko kaxon jitaxin xroon chijnie ndo Dio:

Xro me e tontengixin chujni ko texin na nunte.

Ko kontengixin na xro me e ixi kuitikaon a na chijnie ndo Dio ko jaña tixinixin tson en na.

### *Sen tjajnée ndo Dio*

<sup>9</sup> \*Ko ja anta, ndo Dio tsikincha anta ndo me e tsikjannta ndotaana sinche e ixra ngajin ndo Rey, ko ja anta naa tjajnée ndo, naa tjajna tjúá. Ko ndo Dio kuantsjexinnta ndo ti naxixe e ko kuajon ndo

juachaxin tsixin innta ti chaxro tingasáña, ko jaña xrochronganta nge e jian juinche e ndo Dio.

<sup>10</sup> Ja anta seno tikinixian inta tjajnéé ndo Dio, ko jai ó tikinixin annta tjajnéé ndo. Seno ndo Dio bikonóa inta ndo ko jai je e ndo tsango tikonóa anta ndo.

*Ndako sinche ena ixi jaña tsjakoxinna xrée ndo Dio*

<sup>11</sup> Kichuuna, jan an tsango tjua anta, ko tinóatáana ngajinnta xranchi naa ngisen kuixin ikjín. Chje anta asáanta juachaxin xroxraxaon ti ndako a ko tsikakuenxin nge e jii nunte xasintajni, ixi ti ndako a me e tsetoka o asáanta.

<sup>12</sup> Jian nche enta ngajin chujni chúxin a ndo Dio, maski jai ndako a nichja na ixi ja anta xranchi xrokjuinta naa ni ña i. Jaña je e na tsikon na ixi jian nche enta ko jaña tsajon na juasaya ngajin ndo Dio nchakon je e ndo sinchéña ndo ijié ngajin chujni.

<sup>13</sup> Ja anta ti titikaonnta ndo Dio, titikaonnta kain ni tetuan an ngujngu tjajna, ko kaxon xi ícha tituan an tjajnánta,

<sup>14</sup> ko kaxon titikaonnta kain xi tituan an ngujngu tjajna ijié ixi ndo Dio kuinche e ndo xa ixi je e xa sinchéña na ijié ngajin chujni nche e ti ndako a ko xronichja xa jian ngajin sen nche e ti jian.

<sup>15</sup> Ndo Dio tjaun ndo sinche enta ti jian ixi jaña tsikon kain chujni noe a ko ni ninta ixi jaña tsjankata inta na ijié.

<sup>16</sup> Nche enta xranchi xrochondanta juachaxin xro an ngisen xrokuituan annta, ko ndachro anta ixi juachaxin me e chao sinche enta nge e ndako a. Cháña nche enta xranchi naa sen nchexrée ndo Dio.

17 Jian nichje enta kain chujni. Tjue enta sen kichuunta, ko titikaonnta ndo Dio ko titikaonnta ngajin xi tituan an tjajna.

*Nge e xrokonda sinche e ni nchexra*

18 Ja anta ni nchexra, titikaonnta ni xrée nche enta ko nichje enta na jian, ko je a je o ni jian nichja anta. Na i, kaxon titikaonnta ni ña i.

19 Ndo Dio nchenchaon ndo ngisen titikaon ko tokuaxin en sen tatsinga sen xrojan juachjaon, maski tikinixien a sen tsatsinga sen juachjaon me e.

20 Siá ja anta nche enta naa nge e ndako a ko kondeexin me e tikaonnta, ¿á tjintee ti tokuaxin annta tikaonnta siá tikinixin annta me e? Ko siá nche enta naa nge e jian ko kondeexin me e tikaonnta ko tokuaxin anta, me e naa nge e jian tikon ndo Dio.

21 Méxin kuiya anta ndo Dio ixi ndo Cristo tsango tangi kon en ndo ixi jaina, ko jaña juakoina ndo ixi jaña xrokonda sinche e jaina.

22 Je e ndo xro an ti ndako a juinche e ndo ko nai a juincheya ndo.

23 Nchakon koyaku e na ndo, je a naxraje o juatingíexin ndo; ko nchakon chinga juinchekaon na ndo, je e ndo juanchia i ndo ijié tsama na. Je e ndo bake e ndo ngaya itja ndo Dio nge e jinchekaon na ndo ixi ndo Dio nduaxin nchéña ndo ijié.

24 Ndo Cristo bikao ndo jéina nchakon kuen en ndo nganito ntacru ixi jaina íxro an ti ndako a xrojuintu una, ko jian sinche ena. Je e ndo tangi juinchekao na ndo ixi jaña jaina xrokoxruaina.

25 Ixi jaina kuanche ena xranchi kutuchjon tsingachrue. Ko jai ó kjanna titika onna ndo

Cristo, ndo tayakon en aséeina xranchi naa ngisen tayakon en kutuchjon.

### 3

#### *Xranchi sinche e sen tsikute e*

<sup>1</sup> \*Jaña kaxon ja anta nchri ó tsikuta anta, titikaonnta ndoxi anta. Ko siá xrojan je e xa xratitikaon a xa chijnie ndo Dio, tsikon xa ixi ja anta jian titikaonnta ko íxrokonda i xrondachenta xa ixi tsitikaon xa; je o je e xa tsaxi tsitikaon xa

<sup>2</sup> ixi tsikon xa nge e jian ko ndako nche e ja anta.

<sup>3</sup> \*Ti tonchjian ja anta je a je o ixi tsikonni ti chaxro take énta, xranchi ti tsi te jáanta ko tsika-keenta nge e tsikóñaxin chika oro ko manta chaxro ko tsango tjintee.

<sup>4</sup> Ko ti jian xroxraxaonnta me e tsixin ngaya asáanta ko ti jian xronichjanta. Ji i nai a tsjexin ixi ndo Dio me e nche e ndo juaxruxin.

<sup>5</sup> Jaña kuanche e kaxin nchri ó seno, kuachúntia nchra ngajin ndo Dio ko kuakitikaon nchra ndoxi e nchra.

<sup>6</sup> Jaña jan Sara kuitikaon jan ndoxi e jan, ndo Abraham, ko kuandache jan ndo “Nchána”. Ko siá ja anta jian sinche enta ko xro an nge e xrox-rakon ennta, xrokjannta xranchi je e jan.

<sup>7</sup> \*Kaxon ja anta sen xi, jian tariku unta janchri anta. Nichje enta jan jian ko xraxaonnta ixi ícha soji a jan xranchi ja anta. Ixi kaxon ndo Dio chjée ndo jan juachaxin tsechón jan kain nchakon xranchi juachaxin kuajon ndo ngajinnta



ixi tjua anta ndo. Ko siá jaña sinche enta, ndo Dio tsin en ndo nge e tsjanche enta ndo.

*Ti xrokonda sinche e sen titikaon ndo Cristo*

<sup>8</sup> Méxin, xraje o xroxraxaon kainnta. Tikonóe é kichuunta, tjue é kichuunta, tingijna ko tjento kichuunta ko nchejié a asáanta.

<sup>9</sup> Ko siá xrojan nge e ndako a junta anta xrojan ngisen, ncheku inta na naxraje o. Siá koyaku anta na, ja anta tuyakuen anta na. Cháña tjanche enta ndo Dio sinchenchaon\* ndo na xixi ja anta no anta ndo Dio kuiya anta ndo xixi tsaye enta naa nge e jian tsajon ndo.

<sup>10</sup> Xixi jitaxin xroon chijnie ndo Dio:  
Ngisen xrotjue e aséen ko tjaun xrochóna  
juaxruxin kain nchakon  
xrokonda xronichja i sen ti ndako a,  
ko xronichja i sen juancheya.

<sup>11</sup> Tsingaxiton sen ti nge e ndako a  
ko sinche e sen nge e jian,  
ko tsjée sen juaxruxin tsintee sen  
ko kain nchakon jaña sinche e sen.

<sup>12</sup> Xixi Ncháina tingijna ndo sen jian nche e  
ko tin en ndo nge e nichja sen ngajin ndo,  
ko Ncháina tingijna i ndo ni ndako a nche e.

<sup>13</sup> ¿Méxin, ngisen sinta anta naa nge e ndako a  
siá ja anta kain nchakon nche enta ti jian?

<sup>14</sup>\*Ko maski tangi tsatsinganta kondeexin ti jian  
nche enta, juaxruxin tinteenta ko xrakuen anta  
ninaa ngisen ko ta inta juachjaon.

---

\* **3:9 sinchenchaon** bendecir **3:14** Mt. 5:10.

15 Cháña tájonnta juasaya† ngajin ndo Cristo ixi je e ndo Ncháina ndo. Jian tjate enta nge e ts-janchangi anta na ixi titikaonnta Ncháina. Ko nchejié a asáanta ko jian nche enta ngajin na.

16 Ko jian tjakoxinnta ixi jaña ni ningakon annta ko ndako a nichja na ixi ti jian nche enta ixi ja anta titikaonnta ndo Cristo, me e tsikon na ko jaña tsosue e na.

17 Ixi cháña tangi tsatsinganta kondeexin ti jian nche enta ko me e tjaun ndo Dio, ko je a kondeexin ti ndako a.

18 Ixi kaxon ndo Cristo je o naa kuen en ndo ixi jíeina. Je e ndo jian ndo ko kuenxin ndo ixi jaina ni ña i, ixi jaña tsjentona ngajin ndo Dio. Ndo Cristo kuen en cuerpoe ndo ko Espíritue ndo Dio juinchexechón ndo.

19 Jaña kaxon espíritue ndo juincheno e kain espíritu tsiken en ixi je e ndo xechón ndo,

20 espíritue ni me e kuitikaon a nchakon bake e ndo Noé. Ndo Dio chón en ndo na ixi xrokuitikaon na nchakon konchjian ntaa tetaon inda ko je o ijni chujni kuitikaon ko sen me e kuitjáña i sen nchakon chrite e na inda.

21 Inda me e xrokjui xranchi ti tikitée chujni ixi jaña tsjacha tsitjáña i. Ko ti tikitéeni je a je o tsijma ntau eni. Na i. Me e xrondachro ixi tsjanche eni ndo Dio sinchetjúa ndo aséenni ko jaña tsono eni ixi xro an ije chónani. Ko ti xechón Ncháina Jesucristo me e tsjachani tsechónni kain nchakon.

22 Je e ndo Cristo sakjui ndo ngajni ko jii ndo ndatsjonxin ti jian ti jii ndo Dio ko je e ndo

---

† 3:15 *juasaya* respeto, honor

tetuen en ndo kain sen ángel ko kain ti chóna juachaxin.

## 4

### *Tsintena xranchi tjaun ndo Dio*

<sup>1</sup> Tsango tangi kuatsinga ndo Cristo nchakon bake e ndo nunte nti i, jaña ja anta kaxon xrokonda tsituaxinta tangi tsatsinganta nchakon tsii juachjaon ixi, siá tangi tsatsinganta, jaña tsaxi tsintu enta ti ndako a kuanche enta,

<sup>2</sup> ko me e sinche enta xranchi tjaun ndo Dio, ko í je a xranchi kuaxraxaonnta sa ó, xranchi nche e ni ndako a xraxaon.

<sup>3</sup> Ixi ó itsjé nano jaña kuanche enta. Nchakon me e ndakua i kuaxraxaonnta ko kuanche enta ti ndako a ko kuancheñanta kia ti bakoannta ko kuaketoku u chujni ko kuatjue enta ídolo, ti tjaun a ndo Dio sinche enta.

<sup>4</sup> Jai ni chúntia i ndo Dio toñaon na ixi ja anta í chrjiku anta na cha o ña i chrji je e na. Méxin, chinga nichja na kontraanta.

<sup>5</sup> Ko je e na xrokonda xrochronga kain ti ndako a juinche e na nchakon tsii na ngajin ngisen jichón en sinchéña ijie ngajin kain chujni jichón ko ni tsiken en.

<sup>6</sup> Méxin, ni tsiken en kaxon kuin en na chijni natjúá ixi espíritu na tsjacha tsechón xranchi tjaun ndo Dio, maski koñe e na ijie nchakon kuin-tee na nti i nunte xasintajni xranchi toñe e ijie kain chujni ndako a nche e.

<sup>7</sup> Ó tuinxin tsjexin nunte xasintajni, méxin, jian tinteenta ko nduaxin nichje enta ndo Dio.

<sup>8</sup> Ko ti ícha t̄jintee me e xrotjue é kichuunta. Ko siá t̄jue é kichuunta me e xrotjáña anta ti ndako a juincheko kichuunta.

<sup>9</sup> Jian taye énta sen kichuunta nchakon ts̄ji sen ndointa ko t̄jakaxin a kichuunta.

<sup>10</sup> Ngujngunta jian tingijnanta sen kichuunta xranchi juachaxin t̄jáanta ndo Dio ko ndako sinche enta ixr̄a kuajon ndo Dio.

<sup>11</sup> Siá xrojan ja anta xronichjanta chijnie ndo Dio, nichjanta xranchi t̄jaun ndo Dio. Ko siá xrojan ja anta tsingijnanta xrojan ngisen, jian tingijnanta sen me e xranchi juachaxin t̄jáanta ndo Dio. Ixi kain ixr̄a jian nche enta, me e je e ndo tsayé e ndo kain juasaya ixi je e ndo t̄ikinixin en ndo kain juachaxin, kain nchakon. Jáña tson en.

### *Xrokonda tangi tson en sen titikaon ndo Cristo*

<sup>12</sup> Kichuuna, tsango t̄jua anta, ko xronka inta nge e tangi tsatsinganta ko ndachro anta sonda jáña jiton en.

<sup>13</sup> Cháña take énta juaxruxin maski jáña tangi tsatsinganta ixi jáña tangi kuatsinga ndo Cristo. Méxin jáña juaxruxin tsinteenta nchakon tsikonnta ijié juachaxin chón̄da Ncháina nchakon xrokjan ndo.

<sup>14</sup> Juaxruxin take énta nchakon nichjangí anta n̄a ixi titikaonnta ndo Cristo ixi Espíritue ndo Dio chón̄da kain juachaxin ko tayakon annta kain nchakon. Je e n̄a nichjangí e n̄a Ncháina, a ja anta t̄ájonnta juasianta ngajin ndo.

<sup>15</sup> Ko siá xrojan ja anta tangi tson annta, je a ixi naakóñaxónnta naa chujni ō kue enta xrojan nge e

o xrojan nge e ndako a juinche enta, ko je a ixi juitexinnta naa nge e tikinixian inta.

<sup>16</sup> Ko siá xrojan ja anta tangi tson annta ixi titikaonnta ndo Cristo, tosua inta. Cháña tájonnta juasianta ngajin ndo Dio.

<sup>17</sup> Ó kuu nchakon tsaxi tsoña ijie ko xrokonda xroxrangixixín ngajin sen ikjan chjen en ndo Dio. Ko siá xroxrangixixín tsóña ijie ngajin jaina, ¿á je a ícha tangi tson en chujni titikaon a chijnie ndo Dio?

<sup>18</sup> Ko siá sen jian nche e, tsango tangi tsixixin sen ti tetuan an ndo Dio, ícha tangi tson en ni ndako a nche e ko kuitikaon a chijnie ndo Dio.

<sup>19</sup> Ko ngisen tangi stet atsinga xranchi tjaun ndo Dio, sen me e tsintue a sen sinche e sen ti jian ko tsake e sen aséen sen गया tja ndo Dio, ndo juinchéña kain chujni, ixi je e ndo nduaxin nche e ndo nge e ndachro ndo.

## 5

### *Nge e kuetuen en sen tetuan an ni ngo*

<sup>1</sup> Ntaxraxa on sen titaon en sen ste ni ngo, ixi jan an kaxon titaon an sen ningona xranchi je e sen, ko kaxon jan an nóna ko bikon xranchi tangi bake e ndo Cristo, ko jan an kaxon tsayá a juachaxien ndo Dio xranchi juachaxin tsayé e je e sen nchakon tsii Ncháina.

<sup>2</sup> \*Tayakon ennta jian sen ikjan xranchi kutuchjoen ndo Dio, sen tikinixin anta tayakon ennta ixi ji i ixra kuaye enta. Juaxruxin tingijnanta sen xranchi tjaun ndo Dio, ko je a

ixi xrokonda sinche enta xra me e ko je a ixi tsjachanta tomi. Na i. Juaxruxin nche enta xra me e.

<sup>3</sup> Ko nche anta xranchi ja anta tikinixin annta sen titikaon Ncháina. Na i. Tjue enta sen jaña tsjakoxinnta ixi ndako rinche enta.

<sup>4</sup> Ko nchakon tsij ndo Cristo, ndo nduaxin jian tingatjia kutuchjoen, ja anta tsaye enta naa corona chaxro, ko corona me e nai a tsjexin.

<sup>5</sup> Kaxon jaña, ja anta chajan, titikaonnta sen tituan annta ngaxin in ni ngo. Kainnta jian titikaon kichuunta ko nchejié a asáanta ixi:

Ndo Dio tjaun a ndo sen nchejié aséen,  
ko sen nchejié a aséen, sen me e ndo Dio tingijna  
ndo sen.

<sup>6</sup> \*Méxin, nchejié a asáanta ngajin ndo Dio ixi je e ndo tsango chónnda ndo juachaxin, ko jaña tsii nchakon je e ndo ijié juachaxin xrotjáanta ndo.

<sup>7</sup> Ko kain juachjaon chondanta takéanta ngaya itja ndo Dio ixi je e ndo nduaxin tayakon annta ndo.

<sup>8</sup> Jian xraxaonnta ko kain nchakon tsje enta jian ixi Xixron anxrée, xi ningakon annta, ichrji xa xranchi naa kujenda tsango jie e ko tsango soji tuyako ba ko jitjee ba nge e chujni sine ba jaña nche e xi me e.

<sup>9</sup> Jian chuntianta Ncháina. Tintue anta Xixron anxrée tsjacha xa tsetuan annta xa, ko jian xraxaonnta ixi kaxon sen kichuunta, sen chuntia Ncháina, ste nguixin nunte xasintajni tangi stetatsinga sen.

<sup>10</sup> Ko siá ja anta ó tangi kuatsinganta kaxin nchakon, ndo Dio sinchemé e ndo ijié chondanta

ko ícha tsingijnanta ndo ixi nai a tsintu enta ti chuntianta ndo. Je e ndo kuiya anta ndo ixi tsariku unta ndo kain nchakon ti no tetuan an ndo Jesucristo.

<sup>11</sup> Je e ndo tikinixin en ndo tsayé e ndo kain juasaya ixi chónnda ndo juachaxin tsetuan an ndo kain nchakon. Jaña tson en.

*Juexin nichja ndo Pedro*

<sup>12</sup> \*Juasie ndo Silvano, ndo tikon xranchi ndo kichian, je e ndo jian bingijnana ndo ikjin xroon ji i, maski tsjé a nge e ikjin, ko je o ntaxraxa onnta ixi ndo Dio, ndo tjáanta ndo kain juachaxin ko jaña juako ndo ixi nduaxin tjua anta ndo. Ko nai a tjáña anta ixi ndo Dio tsango tjua anta ndo.

<sup>13</sup> \*Sen ni ngo jii tjajna Babilonia, sen kuinche e ndo Dio kaxon xranchi ja anta, xruan annta sen juajna ko kaxon xruan annta ndo Marcos juajna, ndo tikon xranchi chjan na.

<sup>14</sup> Jian chje é kichuunta juajna ko tse e kichuunta tjáanta. Juaxruxin tinteenta ixi chuntianta ndo Jesucristo. Jaña tson en.

**Chijnie ndo Jesucristo  
Popoloca, San Luís Temalacayuca: Chijnie ndo  
Jesucristo New Testament**

copyright © 2016 Wycliffe Bible Translators, Inc.

Language: Popoloca, San Luís Temalacayuca

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 18 Apr 2025 from source files  
dated 29 Jan 2022

ee37a138-f1b9-51ef-b60f-e89d6de4d06f